

# Entrega di dokumento Memorandum of Foreign Trade Regime Curaçao na Minister Cijntje di Desaroyo Ekonómiko

## *Historia tras di Kòrsou su aplikashon pa bira miembro di WTO.*

### **Kòrsou komo opservadó den WTO**

Kòrsou a apliká pa bira miembro independiente den World Trade Organization formalmente na òktober 2019. Riba 3 di mart 2020, konseho general di WTO a aprobá e aplikashon di Kòrsou pa bira miembro opservadó den WTO i asina Kòrsou por a kuminsá e proseso di aksesu na WTO. Nos ambishon ta pa integrá ekonómikamente mas tantu posibel den nos region i asina oumentá eksportashon, ku ta asina importante pa krese nos ekonomia. E integrashon akí ta solamente posibel siendo miembro di WTO, ya ku reglanan di komèrsio internashonal ta keda atendé den e plataforma akí. I tur pais ku ta den nos region ta aktua i negoshá segun e reglanan di WTO. Den e kuadro akí negosiashonnan ta andando ku Colombia, Repúblika Dominicana i nos ta den konsulta avansá ku Trinidad and Tobago i tambe Sürnam pa sera akuerdonan komersial bilateral. Na 2022 lo inisiá kontaktonan ku otro paisnan den nos region manera Guyana, Jamaica, Cuba, Panama, Barbados i Costa Rica.

### **Kòrsou ta konta!**

Ademas di hasi integrashon ekonómiko den region i den mundu posibel pa Kòrsou, WTO ta brinda un sistema ku ta duna transparensia na tur, tantu paisnan grandi i chikitu, basá riba su sistema di akuerdo multilateral, plurilateral i bilateral. Aksesu na WTO ta nifiká ku nos tin ku pone nos kushina na òrdu. Nos reglanan di komèrsio, nos maneho- i leinan, kontrol riba kalidat, transparensia di informashon, krea un merkado kompetitivo pa nos empresa- i invershonistanan i tambe mehorá nos servisio, ta algun di e benefisionan ku un aksesu na WTO ta enserá. WTO ta duna apoyo tékniko na gobièrnu di paisnan ku apliká pa bira miembro. Anto siendo miembro independiente den WTO nos ta konta! Nos por vota, pues nos ta konta. Den e kuadro akí tambe MEO ta den proseso pa yega na un National Export Strategy (NES) ku sosten di Internashonal Trade Centre (un supsidiario di WTO i Nashonnan Uní), pa yuda prepará nos pais pa drenta e arena di komèrsio internashonal ku ta eksigí pa tur pais partisipante ta kumpli ku regla i kondishonnan di komèrsio pa produkto i servisionan.